

# Xojon carta-la San Pablo xi kiski-la Filemón

## Kó tsò Pablo nga síhixat'aà Filemón

<sup>1</sup>Ji Filemón xi ndaà matsjake-lè xi ngàsòn xá-la Na'è-ná títsa'né, 'an Pablo nga ndayá tijnáa'ya k'oií kjoa-la nga xá-la Cristo tís'iaàn, tísìhixat'aà-lè kò 'ndsè Timoteo. <sup>2</sup>Tìkoáá tísìhixat'aà xita naxandá-la Cristo xi ya bixoña ni'ya-lè kò tichjaá Apia kò 'ndseé Arquipo xi tìkoá xá-la Nainá nchikjaán-tji koni 'an. <sup>3</sup>Nainá xi Na'è-ná, kò jè Jesucristo xi otíxoma-ná kàtatsjá-nò kjondaà kò kjoa'nchán ya jiiin inima-nò.

## Kjoatjòcha xi tjin-la Filemón

<sup>4</sup>K'e nga chjàt'aà-la Nainá, kjit'aà naxhrjein sikkítsjeèn it'aà tsiji, k'oaá ma-ne nga tsjaà-la kjondaà Na'è-ná, <sup>5</sup>Koií kjoa-la nga jyeé ki'nchrè nga ndaà mokjeiín-lè it'aà ts'e Na'è-ná Jesucristo tìkoá ndaà matsjachi ngats'iì xita-la Nainá. <sup>6</sup>K'oaá s'ín sjét'aà-la Nainá nga ndaà kítasòn koni s'ín nokjoàkoiì xita xi i'nga it'aà ts'e kjoa xi mokjeiín-lè mé-ne nga isa ndaà jchaxkoin ngats'iì kjondaà xi koma sikitasoán it'aà ts'e Cristo. <sup>7</sup>Ji ndí 'ndsè, 'nó tsja ma-na kò ma'nó takoàn it'aà ts'e kjoatjòcha xi tjin-lè, nga it'aà tsiji-né, nga jye ndaà tìnjetakoìn inima-la jña xita-la Nainá.

## Kó tsò Pablo nga chjatjì Onésimo

<sup>8</sup>K'oaá ma-ne nas'ín it'aà ts'e Cristo tji'nde-na nga kìnè-lè mé kjoa xi s'iin, tanga mìtsà kos'ín tibit'in-lè. <sup>9</sup>Ta jngod kjondaà tísíjé-lè, nga tjiin-ná nga tjòcha 'yaá xinguiáá. Kò jyeé tjiin-lè, 'an Pablo, jyeé xita jchínga-ná, tìkoá ndayá tijnáa'ya xi jè ngatjì-la Cristo Jesús. <sup>10</sup>K'oaá ma-ne nga tísíjé jngod-lè

kjondaà nga ndaà chjoétjoi jè Onésimo xi koni ki'ndí-na komà nga kòkjeín-la 'én ndaà-la Nainá xi 'an tsibenojmí-la nga i tijnaa'ya ndayá.

<sup>11</sup>Nga sa kjòtseé, jè Onésimo, jngod xita chi'nda xi mikii ndaà kjòchjeén-lè, tanga i'ndeí jyeé ndaà kochjeén-ná ingajoá. <sup>12</sup>Tisikasén jngod k'a-lè, 'an nga 'ño matsjake. <sup>13</sup>Ndaá-la s'e tsà i kíjnako-na mé-ne nga sùichját'aà-na koni tsà jì tinìchját'aà-ná, k'e nga takó ndayá tijnaa'ya nga jè ngatjì-la 'én ndaà-la Nainá xi kjoa ts'e Cristo. <sup>14</sup>Tanga majìn-na nga kjo'ño siikíjna tsà ngaji mikii tìjngod takoin, mé-ne jè kjondaà xi tìsijé-lè mì kjo'ño koma-lè; inima-lè kjinchrobàjiin. <sup>15</sup>Tsà koi nachrjein, jè Onésimo, koi kjoa-la tsasit'aà xìn chiba nachrjein-lè mé-ne i'ndeí koma chjoétjò jngod k'a-ne nga ya kíjnako kjit'aà-lè. <sup>16</sup>Tanga kì k'oaá s'ín 'ya takoin koni tsà jngod xi taxki chi'nda; isaá 'ño ndaà jchatakoin koni tsà jngod 'ndsì xi 'ño ndaà matsjachi. 'An, 'ño matsjake; tanga ngaji isaá 'ño tìtsjachi mìtsà ta koi kjoa-la nga chi'nda tsiji koma, koi-né nga jyeé 'ndsè chibá it'aà ts'e Cristo.

<sup>17</sup>Tsà kixí kjoa nga k'oas'ín 'yatakòn-ná nga 'ndseé chibá it'aà ts'e Cristo, chjoétjoi Onésimo koni tsà 'an xi tichjoétjò-ná. <sup>18</sup>Tsà tjín mé kjoa xi ch'o kisìko-lè, koa tsà mé xi kitjen-t'in-lè, 'aán tikichjí-ná. <sup>19</sup>'An, Pablo, 'an sobá tikjiì-lè xojon jè. 'An kíchjíá yije xi tjen-la. Mikii mochjeén nga 'an koxán-lè, jyeé tíjiin-lè nga 'aán kitjen-t'in-ná kjoabinachon-lè. <sup>20</sup>Ndí 'ndsè, k'oaá s'ín tìsijé-lè nga kàtasakó jngod-na kjondaà it'aà tsiji, koni s'ín ok'in-la nga 'ndseé chibá it'aà ts'e Na'èn-ná; tije takoin inima-na it'aà ts'e Cristo. <sup>21</sup>Be-ná nga sikitason-né; k'oaá ma-ne nga tìsikasén-lè xojon jè; skanda 'beé-la takoàn, nga isaá tsatoó s'jin koni s'ín tìxan-lè. <sup>22</sup>K'oaá tìs'ín tìxan-lè nga tikíjnandaà jngod-ná i'nde ñánda ma síkjáya. K'oaá s'ín tikoña nga jè Nainá kjì'nchré-né koni s'ín tìtsanokjoàt'aà-là, nga tsjá'nde-na nga koma kíjkon-nò.

### 'Én-la Pablo xi fehet'aà-ne

<sup>23</sup>Tísíhixat'aà-lè Epafra, xinguiáá xi ngásòn ndayá tìtsajna-jen nga jè ngatjì-la Cristo Jesús. <sup>24</sup>Tìkoáá tísíhixat'aà-lè Marcos, Aristarco, Demas kò Lucas, xi síchját'aà-na kjoa ts'e xá xi tìs'iaàn.

<sup>25</sup>Jè kàtijnajiin inima-nò kjondaà-la Jesucristo xi otíxoma-ná.